


16 IANUARIE

**SLUJBA
SF. CUVIOS
ROMIL
DE LA
RAVANITA**

BELGRAD, 1986



**Мѣсяца Іаннуарія въ 16-й дѣнь.
Памѣть преподобнаго и
богоноснаго отца нашего Ромила
Раваничкаго, Синаита.**

НА ВЕЛИЦѢЙ ВЕЧЕРНИ,

**Блаженъ мужъ... 1-й антифонъ. На Господи
воззвахъ: стихиры на 6, повторяюще я,
гласъ 2. Подобенъ: Егда отъ дрѣва.**

Егда возложился еси отъ юности твоея, якоже
Самуилъ, Господеви, премудре, тогда, яко
финиксъ, процвѣль еси и, яко кедръ Ливанскій,
умножился еси, исполнися знаменій и просіявъ
чудесы и силами, яже, яко приснотекущій
источникъ, источаешь богато рака твоя,
Ромиле, притекающимъ къ тебѣ вѣрою.

[Дважды.]

Егда войстинну не отъ хотѣнія плотскаго, ниже
отъ хотѣнія мужескаго сынъ Божій по причастию
быль еси, тогда Божественный дадеся ти даръ
ко спасенію тебѣ и душамъ во грѣсѣхъ сущимъ.
Тѣмже молимъ тя, яко дерзновение многое ко
Христу имуща, Егоже возлюбилъ еси,
совершающихъ память твою всякаго злаго
обстоянія избави. **[Дважды.]**

Егда́ по сте́зямъ Го́спода Твоего́ ше́ствовалъ еси́,
и зако́нъ Его́ ре́вностію взыска́лъ еси́, тогда́ себе́
очи́стилъ еси́ отъ всякаго́ земна́го пристра́стія, и
плоти́ внѣ́ бы́лъ еси́, Ромиле́ богому́дре, въ
примра́къ же вше́дъ Непристу́пнаго Свѣ́та,
Боже́ственнымъ тайна́мъ научи́лся еси́ и свѣ́та
прича́стіемъ ве́сь свѣ́тъ бы́лъ еси́, богоглаго́ливе.
[Два́жды.]

Сла́ва, гла́съ 8:

Мона́ховъ мно́жества наста́вника тя́ почита́емъ,
о́тче на́шъ Ромиле́, твоёю́ бо сте́зёю войсти́нну
пра́во ходи́ти позна́хомъ. Блаже́нъ еси́, Христу́
рабо́тавъ, и вра́жію обли́чилъ еси́ си́лу, а́нгеловъ
собесе́днице, преподо́бныхъ соприча́стнице и
пра́ведныхъ, съ ни́миже моли́ся Го́сподеви,
помило́ватися ду́шамъ на́шимъ.

И ны́нѣ, богородиче́нь пе́рвый, гла́съ тойже:

Ца́рь Небе́сный за чело́вколю́біе на земли́ яви́ся
и съ чело́вки поживе́, от Дѣ́вы бо Чи́стыя плоть
прие́мый и изъ Нея́ проше́дый съ воспри́ятіемъ,
еди́нъ е́сть Сы́нъ, сугу́бъ естество́мъ, но не
впоста́сію. Тѣ́мже, соверше́нна Того́ Бо́га и
соверше́нна Чело́вка войсти́нну
проповѣ́дающе, исповѣ́дуемъ Христа́ Бо́га
на́шего: Е́гоже моли́, Ма́ти Безневѣ́стная,
помило́ватися ду́шамъ на́шимъ.

Входъ. Прокімень дне и чтенія три, преподобническая.

Премудрости Соломони чтеніе. [Глава 3.]

Праведныхъ души въ руцѣ Божіей, и не прикоснется ихъ мука. Непщевани быша во очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе — сокрушеніе, они же суть въ мирѣ. Ибо предъ лицемъ человѣческимъ, аще и муку примутъ, упованіе ихъ безсмертія исполнено. И вмалѣ наказани бывше, великими благодѣтельствовани будутъ, яко Богъ искуси я и обрѣте ихъ достойны Себѣ. Яко злато въ горниль, искуси ихъ и, яко всеплодіе жертвенное, пріять я. И во время посѣщенія ихъ, возсіяютъ, и яко искры по стѣблю, потекутъ. Судятъ языкомъ и обладають людьми, и воцарится Господъ въ нихъ во вѣки. Надѣющіися Нань разумѣють истину и вѣрніи въ любви пребудутъ Ему, яко благодать и милость въ преподобныхъ Его и посѣченіе во избранныхъ Его.

Премудрости Соломони чтеніе. [Глава 5 и 6.]

Праведницы во вѣки живутъ, и въ Господѣ мзда ихъ, и попеченіе ихъ у Вышняго. Сего ради примутъ царствіе благолѣпія и вѣнецъ доброты отъ руки Господни, зане десницею покрыетъ я и

мышцею защититъ ихъ. Прииметь всеоружіе —
 рвеніе свое и вооружитъ тварь въ мѣсть
 врагомъ. Облечется въ броня правды и
 возложитъ шлемъ — судъ нелицемѣренъ.
 Прииметь щитъ непобѣдимый — преподобіе,
 поостритъ же напрасный гнѣвъ — во оружіе,
 споборетъ же съ нимъ мѣръ на безумныя.
 Пойдутъ праволучныя стрѣлы молніины и, яко
 отъ благокругла лука облаковъ, на намѣреніе
 полетятъ, и отъ каменомѣтныя ярости исполнь
 падутъ грады. Вознегодуетъ на нихъ вода
 морская, рѣки же потопятъ я нагло. Сопротивъ
 станетъ имъ дѣхъ силы и, яко вихоръ, развѣетъ
 ихъ, и опустошитъ всю землю беззаконіе, и
 злодѣйство превратитъ престолы сильныхъ.
 Слышите убо, царіе, и разумѣйте, навѣкните,
 судіи концевъ земли. Внушите держащии
 множества и гордящися о народѣхъ языковъ,
 яко дана естъ отъ Господа держава вамъ и сила
 отъ Вышняго.

Премудрости Соломона чтеніе. [Глава 4.]

Праведникъ, аще постигнетъ скончатися, въ
 покой будетъ. Старость бо честна не многолѣтна,
 ниже въ числѣ лѣтъ исчитается. Съдина же естъ
 мудрость челоукомъ, и возрастъ старости —
 житіе нескверное. Благоугоденъ Богу бивъ,
 возлюбленъ бысть, и живый посреде грѣшникъ,

преста́вленъ бы́сть. Восхище́нъ бы́сть, да не злоба измѣнитъ разума его́ или лѣсть прельститъ ду́шу его́. Раче́ние бо злобы помрача́етъ добра́я и паре́ние по́хоти, премѣня́етъ у́мъ незлобиво́у. Сконча́вся вма́лѣ, испо́лни лѣ́та до́лга, уго́дна бо бѣ́ Господеви ду́ша его́, сего́ ра́ди потща́ся отъ среды́ лука́вствія. Лю́діе же ви́дѣвше и не разумѣ́вше, ниже́ поло́жше въ помышле́ніи тако́вое, я́ко благода́ть и ми́лость въ преподо́бныхъ Его́ и посѣще́ніе во избра́нныхъ Его́.

На литіи стихи́ры самогласны, гласъ 2:

По́стническое обуче́ніе собра́въ на земли́, преподо́бне Ромі́ле, страсте́й прило́ги течене́мъ слезъ твои́хъ вся́ потопи́лъ еси́. Лѣ́ствица Божество́нная и честна́я, на не́бо возводя́щая, всѣ́мъ позна́ся богоприя́тное житіе́ твоё, благоче́стія бо плоды́ въ нёмъ показа́въ, исцѣ́ляеши тѣ́ми немо́щи стратей вѣ́рно вопію́щихъ тебѣ́: Ра́дуйся, Правосла́вія звѣздо́ златоза́рная, мона́шествующихъ свѣти́льниче и па́стырю! Ра́дуйся, приснопа́мятне, пусты́ни добрѣ́йшее воспита́ніе и Це́ркве непоколебимо́е утвержде́ніе! Ра́дуйся, заблуждши́хъ вели́кій наста́вниче! Ра́дуйся, на́ша похвало́ и всѣ́мъ правосла́внымъ свѣ́тлое ра́дование.

Божественнымъ разумомъ умъ свой укрѣпивъ, отче Ромиле, предтеклъ еси мимогрядущая вся, никакоже удивлься земнымъ: въ скорбехъ убо ты являшеся велемудръ и доблественъ, въ постѣхъ и благодушii смиренъ и кротокъ, и тако настоящаго житiя нестойтельную пучину явѣ прешель еси и доброе пристанище достигль еси. Христа убо моли помилovati души наша.

Вся имѣнiя отринулъ еси, отче Ромиле, яко вышняго житiя желаяй: богатство возненавидѣлъ еси, одѣявся во смиренiе; пищи отвратилъ еси, облобызавъ воздержанiе; неправду презрѣлъ еси, правду возлюбивъ; иноки въ пустыни поселилъ еси, и сiя грады сотворилъ еси, идѣже искушенiй множество претерпѣвъ, бѣсовскiя полки посрамилъ еси. Тѣмже, преподобне, помяни насъ въ молитвахъ своихъ ко Господу.

Слава, гласъ 4:

Просiя житiе твоѣ яко солнце на земли и на небесi, Христовъ угодниче, блаженне Ромиле, православно бо проповѣдалъ еси истинную и непорочную вѣру Христову. Тѣмже молися, преподобне, память твою совершающимъ дароватися велией милости.

И нынѣ, богородиченъ, гласъ тойже:

Призри на молѣнія Твоихъ рабъ, Всенепорочная, утѣляющая люта на ны востанія, всякія скорби насъ измѣняющая, Тя бо едину твердое и извѣстное утверждение имамы, и Твое предстательство стяжачомъ, да не постыдимся, Владычице, Тя призывающии, потщися на умоление Тебѣ вѣрно вопіющихъ: радуйся, Владычице, всѣхъ помощи, радости и покрове, и спасение душъ нашихъ.

На стиховнѣ стихиры, гласъ 5. Подобенъ: Радуйся.

Радуйся, Ромиле преподобне, монашествующихъ свѣтлое удобрение, разсужденія доброе правило, смиренія образе, церковное утверждение, православнымъ споборниче, житіе бо твое на земли воистинну благочестно пожилъ еси, дондеже къ ангельскимъ ликомъ преложился еси, съ нимиже молися Христу даровати душамъ нашимъ миръ и велию милость.

Стихъ: Честна предъ Господемъ смерть преподобныхъ Его.

Радуйся, Ромиле преподобне, воздержанія учителю, постниковъ похвало, Божественныхъ повелѣній исполнителю, богосвѣтлый свѣтильниче, иже въ мракъ невѣдѣнія сердцецъ

человѣческихъ входя, богогласными словесы просвѣщаль еси и наставляль еси къ разуму истины Христа, Бога нашего. Егоже моли даровати душамъ нашимъ миръ и велию милость.

Стихъ: Блаженъ мужъ, бойся Господа, въ заповѣдехъ Его восхощетъ зло.

Радуйся, Ромиле преподобне, честное жилище Святаго Духа, дарованій Божественныхъ исполненное, твое убо житіе равноангельное, правило добродѣтелей явися и образъ извѣстный хотящимъ Господеви служити, слово же твое богомудрое прелесть всякую изъ корене востерзаетъ и душелѣнныя возбуждаетъ къ славословію Христа, Бога нашего, Егоже моли даровати душамъ нашимъ миръ и велию милость.

Слава, гласъ 6:

Отъ юности облистá житіе твое добродѣтелей лучами, преподобне отче Ромиле, Крестъ бо Христовъ на рамо вземъ, невозвратно Тому послѣдовалъ еси, потщався худшее покорити лучшему и плоть поработити духу, и умъ, владыку, надъ страстьми воцарити. Тѣмже и себе уготовалъ еси обитель Святыя Троицы,

Ейже предсто́я со дерзнове́ніемъ, моли́ся о и́же
вѣрою творящихъ честную́ па́мять твою́.

И ны́нѣ, богоро́диченъ, гла́съ тойже:

Творе́ць и Изба́витель мо́й, Пречи́стая, Христо́съ
Госпо́дь, изъ Твои́хъ ложе́снъ проше́дь, въ мя
оболкѣ́йся, пе́рвыя кля́твы Ада́ма свободи́.
Тѣмже́ Ти, Всечи́стая, я́ко Бо́жии Ма́тери же и
Дѣ́вѣ, воистинну вопі́емъ немол́чно: раду́йся
ангельски, раду́йся, Влады́чице,
предста́тельство, и покрове́, и спасе́ние ду́шъ
нашихъ.

**На благослове́ніи хлѣ́бовъ: Тропа́рь
преподобна́го, два́жды и Богоро́дице Дѣ́во.,
единожды.**

Тропа́рь преподобна́го, гла́съ 8:

Сле́зь твои́хъ течены́ми пусты́ни безпло́дное
воздѣ́лалъ еси́, и и́же изъ глублины́ въздыха́ньми
во сто́ трудо́въ у плодоноси́лъ еси́, и бы́лъ еси́
свѣти́льникъ вселе́ннѣй, сія́я чудесы́, Роми́ле
о́тче на́шъ, моли́ Христа́ Бо́га спастися ду́шамъ
нашимъ.

НА УТРЕНИ

**На Богъ Господь... Тропарь преподобнаго:
Слезъ твоихъ теченьми..., дважды. Слава, и
нынъ, богородичень.**

По 1-мъ стихословіи съдалень, гласъ 1:

Ромила честнаго пѣсньми восхвалимъ, вся силы
вражія постническими труды низложившаго, и
къ Божественному покою прешедшаго, и со
ангелы нынъ пребывающаго, и молящагося о
насъ Господеви, яко да обрящемъ милость.

[Дважды.]

Слава и нынъ, богородичень, гласъ тойже:

Матерь Тя Божію молимъ вси, Дѣву войстинну и
по рождествѣ явльшуюся, любовію прибѣгающіи
къ Твоей благодости: Тебѣ бо имамы, грѣшніи,
Предстательницу, Тебѣ стяжахомъ въ напастехъ
спасеніе, едину Всенепорочную.

По 2-мъ стихословіи съдалень, гласъ 4:

Зарями Духа просвѣтивъ твоѣ сердце,
просвѣщаль еси души притекающихъ къ тебѣ съ
вѣрою. Нынъ же, со ангелы престола
Божественному предстоя, и зря, яже видѣти
желаше, чадомъ твоимъ согрѣшеній прощенія
испроси, яко да присно тя почитаемъ, Ромиле

преблаженне, преподобныхъ похвалó и ангеловъ
единокровниче. **[Дважды.]**

Слава и нынѣ, богородиченъ, гласъ тойже:

Удивися Іосифъ, еже паче естества зря и
внимаше мыслию, иже на руно дождь, въ
безсменномъ зачатїи Твоемъ, Богородице,
купину, огнемъ неопалимую, жезлъ Аароновъ
прозябшій, и, свидѣтельствуя, обручникъ Твой и
хранитель священникомъ взываше: Дѣва
раждаетъ и по Рождествѣ паки Дѣвою
пребываетъ.

Поіелей.

Величаніе: [Ублажаемъ тя, преподобне отче
Ромиле, и чтемъ святую память твою,
наставниче монаховъ и собесѣдниче ангеловъ].

Псаломъ избранный преподобному: [Терпя
потерпѣхъ Господа, и внять ми и услыша
молитву мою...]

По поіелєи сѣдаленъ, гласъ 8:

Пастырскую хитрость воспрїимъ,
монашествующихъ столпе и основаніе, разумно
упаслъ еси разумное стадо твоє, Христова бо
возжелѣвъ Божественная ученія, въ нихъ слово
посѣялъ еси, преподобне, и къ ревности
ангельскаго жителства воздвиглъ еси вся

единомудренно славити Бога, богоносе Ромиле, моли Христа Бога прегрешений оставление даровати чтущимъ любовию святую память твою. **[Дважды.]**

Слава и нынѣ, богородиченъ, гласъ тойже:

Небесную дверь и кивотъ, всесвятую гору, свѣтозарный облакъ воспоймъ, небесную лѣствицу, словесный рай, Евино избавление, вселенная вся великое сокровище, яко спасение въ Ней содѣлася мiрови и оставление древнихъ согрешений. Сего ради вопиемъ Ти: моли Сына Твоего и Бога прегрешений оставление даровати, благочестно поклоняющеся Пресвятому Рождеству Твоему.

[Степенна, 1-й антифонъ 4-го гласа.]

Прокименъ, гласъ 4: Честна предъ Господемъ* смерть преподобныхъ Его. **Стихъ:** Что воздамъ Господеви о всѣхъ, яже воздаде ми? **Всякое дыханіе... Евангеліе отъ Матѳея, зачало 10.**

По 50-мъ псалмѣ стихира, гласъ 6:

Преподобне отче Ромиле, во всю землю изыде вѣщаніе исправлений твоихъ. Тѣмъ на небесѣхъ обрѣлъ еси мзду трудовъ твоихъ, демонскія погубилъ еси полки и ангельскія достиглъ еси чины, ихже житію безъ порока поревновалъ еси,

дерзнове́ніе имѣ́я ко Христу́ Бо́гу, ми́ръ испроси́ ду́шамъ на́шимъ.

[**Кано́нъ Богоро́дицы со ирмосо́мъ на 6 и преподо́бнаго на 8.**]

Кано́нъ преподо́бнаго, гла́съ 8, егѡ́же краегранесіе: Божѣ́ственнаго пою́ Роми́ла лю́бовію; **въ пѣрвыхъ же богоро́дичнахъ:** Иоаса́фъ.

Пѣ́снь 1.

Ирмо́съ: *Колесницегонителя фараона погрузи́ чудотвори́и иногда́ Моисе́йскій же́зль, крестообра́зно порази́въ и раздѣ́ливъ мо́ре, Изра́иля же бѣ́глеца, пѣ́шеходца спасе́, пѣ́снь Богови воспѣ́вающа.*

Бо́жій Сло́ве, всеси́льную да́руй ми́ и свѣ́тлую Ду́ха благода́ть ко отверже́нію у́стъ мои́хъ, яко да по́двиги Твоего́ уго́дника воспою́ и болѣ́зненная страда́нія, и́миже на земли́ Тя́ просла́ви.

Отче блаже́нне, ты́ Крѣ́сть Христо́въ на ра́мо взѣ́мъ, и земна́го всяка́го пристра́стія внѣ́ бы́въ, Христу́ послѣ́довалъ еси́, взыва́я: вслѣ́дъ Тебе́ теко́хъ въ воню́ мѹра, Влады́ко.

Желая́ получи́ти, и́хже ны́нѣ наслажда́еши́ся преизря́дно, и того́ ра́ди е́ще въ жи́зни се́й па́че чело́вѣ́ка подвиза́лся еси́, я́же получи́ти и на́мъ,

моли́ Христа́, почита́ющимъ честную́ память твою́, досточудне.

Богородичень: Иису́съ предна́реченный, Бо́жие Сло́во, съ небесе́ сниде, яко да отъ го́рькаго мучи́тельства на́съ изба́вить, и плоти́ю одѣ́яся отъ Пречи́стыя Дѣ́вы, Ю́же соблюде́ нетлѣ́нну по рождествѣ́ и непоро́чну.

Пѣснь 3.

Ирмосъ: *Утвержде́й въ нача́лѣ небеса́ разумомъ и зе́млю на вода́хъ основа́вый, на ка́мени мя́, Христе́, заповѣ́дей Твои́хъ утверди́, яко́ нѣсть свя́тъ, па́че Тебе́, Еди́не Человѣ́колюбче.*

Еще́ на земли́ пребыва́я, Бо́га просла́вилъ еси́, о́тче, чудесы́ всякими и разли́чными си́лами, И́же ты свѣ́тлѣйше возвели́чи ны́нѣ на небесе́хъ.

Самуи́ла Освяти́вый пре́жде рождества́, и ты́ освяти́, преподо́бне Роми́ле, и пока́за ты́ во іере́ехъ, яко́же Моисе́я и Ааро́на, призыва́ющихъ Его́ Боже́ственное и́мя.

Ты́, яко́ да приобря́щеши боже́ственный и многоцѣ́нный бисеръ — Христа́, ополчи́лся еси́ къ нача́ломъ и ко власте́мъ, къ духо́вомъ лука́вствія́ поднебе́снымъ.

Богородичень: О, кто отъ земнородныхъ изречеть, Богородице Маріе, или кій языкъ послужити возможетъ еже въ Тебѣ таинству? Страшно естъ воистинну, Всепѣтая Дѣво, Яже прежде вѣкъ Сущаго подъ лѣты родила еси.

Съдалень, гласъ 8:

Закону Господню ты научився, яко финиксъ процвѣль еси, отче преподобне, вѣрныхъ души радости неизреченныя исполняя и лица ихъ уясняя. Тѣмже, сошедшеся днесь, воспѣваемъ тя и вѣрою молимся: богоносе Ромиле, моли Христа Бога грѣховъ оставленіе даровати чтущимъ любовію святую память твою. **[Дважды.]**

Слава, и нынѣ, богородичень, гласъ тойже:

Въ напасти многоплетенныя впадъ отъ врагъ видимыхъ и невидимыхъ, бурю одержимъ безчисленныхъ согрѣшеній моихъ, [и] яко къ теплomu заступленію и покрову моему, Чистая, ко пристанищу притекаю Твоя благасти. Тѣмже, Всечистая, молися прилѣжно изъ Тебѣ Воплощенному безсѣменно о всѣхъ рабѣхъ Твоихъ, непрестанно молящихъ Ти ся, Богородице Пречистая, молящи Его присно согрѣшеній оставленіе даровати, воспѣвающимъ достойно славу Твою.

ПѢСНЬ 4.

Ирмосъ: Ты́ моя крѣ́пость, Го́споди, Ты́ моя и́ сила, Ты́ мой Бо́гъ, Ты́ мое́ ра́дованіе, не оста́вь нѣ́дра Отча, и на́шу нищету́ по́сѣтѣвь. Тѣ́мъ съ проро́комъ Авваку́момъ зову́ Ти: си́лѣ Твое́й слава, Человѣ́колю́бче.

Все́ мо́ре ино́гда потре́бити хваля́йся сатана́ вселука́вый, твои́ми но́гами сокруше́нъ бы́ти паде́ніемъ зрѣ́тся. На твёрдомъ бо ка́мени Христа́ ты́ утверди́вся, богоглаго́ливе, куми́ры Вавило́нскія сокруши́лъ еси́.

Еди́нственному Су́ществу́ Пресу́щественному и Трисвѣ́тлому преда́лся еси́ раче́ніемъ, превзя́вся отъ земныхъ Боже́ственнымъ жела́ніемъ, и свѣ́тъ вторы́й показáлся еси́, поживѣ́въ па́че естества́ и су́щихъ въ ми́ръ про[с]вѣ́щая.

Ны́нѣ войсти́нну не въ гада́ніи, но чи́стѣ́ лицемъ къ Ли́цу богосі́янно зрѣ́ши сла́ву Трисо́лнечно́го Боже́ства, Е́гоже ми́лостива на́мъ сотвори́ въ де́нь су́дный, небрего́мо житіе́ иждивши́мъ.

Богороди́чень: Съ небесе́ снѣ́де на зе́млю Зижди́тель мой и плоть мою́ воспрі́я кромѣ́ грѣ́ха, и поноше́нія всякі́я, и конечно́ смѣ́рть претерпѣ́ мене́ ра́ди, Е́гоже благопремѣ́нна сотвори́ ми́, Влады́чице.

ПѢСНЬ 5.

Ирмосъ: *Вскую мя отринуть еси отъ лица Твоего, Свѣте незаходимый, и покрыла мя естъ чуждая тма окаяннаго? Но обрати мя, и къ свѣту заповѣдей Твоихъ пути моя направи, молюся.*

Новый Моисей показался еси, досточудне, Египта уязвимый, море лютаго мятежа земнаго раздѣливый, и люди отъ кала плинотворенія исторгнувший, и къ Божественному веселію возведый.

Апостоловъ двенадцятицѣ счислился еси, богоблаженне, аще и лѣты отстойши послѣжде, но не и житіемъ изряднымъ, и богомудріемъ, и ревностію, яже по вѣрѣ.

Грѣбъ твой, яко источникъ приснотекущій, источааетъ исцѣленія, премудре, и недугъ всяческихъ свободни бывшии, съ радостію пѣснословятъ сице прославльшаго тя Господа.

Богородичень: Спасеніе, и покровъ, и пристанище тихое вѣмы Тя, Пречистая, и призываемъ Твое скорое заступленіе. Тѣмже предстани ми, и во время исхода моего воздушныхъ мя духовъ исхити лукавствія.

ПѢСНЬ 6.

Ирмосъ: *Очи́сти мя́, Спа́се, мно́га бо беззако́нія моя́, и изъ глублины́ золь возведи́, молю́ся, къ Тебѣ́ бо возопи́хъ, и услы́ши мя́, Бо́же спасе́нія моего́.*

Острото́ю по́мысла и до́блестію ума́ отъ Бо́га прія́ль еси́ тезоименно́, преподо́бне о́тче, злѣ́йшимъ бѣ́сомъ сплесті́ся, и до конца́ си́хъ побѣ́дити.

Просте́ртіемъ ру́къ, яко́же Амалі́ка Моисе́й, невидимы́я враги́ ты побѣ́дивъ до конца́, яко́же и́нъ Иису́съ Нави́нъ, лю́ди наста́вилъ еси́ къ вы́шнему наслѣ́дію, премудре́.

Отче богому́дре Ромі́ле, ты́ вои́стинну блаже́нь показа́лся еси́, ника́коже на пу́ти грѣ́шныхъ ста́въ, но въ зако́нѣ Го́спода твоего́ поуча́лся еси́ де́нь и но́щь.

Богоро́диченъ: Агни́це Пречи́стая, рождество́ безсѣ́менное никто́же ви́дѣ отъ вѣ́ка когда́, дѣ́вицу доя́щую никто́же слы́ша нигдѣ́же, на Тебѣ́ же обо́я узрѣ́шася. О, страна́го чудесе́!

Конда́къ, гла́съ 3. Подо́бенъ: Дѣ́ва дне́сь.

Свы́ше си́лу ты́ прие́мь, богоно́се, бѣ́совская ополче́нія посрами́ль еси́, восприе́мь же отъ Бо́га

чудесъ благодать, подаеши обильно притекающимъ къ тебѣ вѣрою. Сего ради почитаемъ, Ромиле блаженне, божественную память твою.

Икосъ:

Отверзи устнѣ мой, треблаженне, боогоприятными твоими къ Богу молитвами, яко да возмогу пѣти божественное твоё житіе и достойно возглаголати добродѣтели твоя, яже Христа ради на земли совершилъ еси. Столпъ бо явился еси и правило иноковъ свѣтлое, стяжавъ житіе равноангельное и въ незаходимая войстинну вселився. Сего ради почитаемъ, Ромиле блаженне, божественную память твою.

Пѣснь 7.

Ирмосъ: *Божія снизхожденія огонь устыдѣся въ Вавилонѣ иногда, сего ради отроцы въ пещи, радованною ногою, яко во цвѣтницѣ, ликующе пояху: благословенъ еси, Боже отецъ нашихъ.*

Юнъ сый ещё, умъ и помышленіе къ Божественнымъ возвысилъ еси и всегда всякаго земнаго желанія внѣ былъ еси, вопія Зиждителю твоему: благословенъ еси, Боже отецъ нашихъ.

Рыбъ ловитвѣ на величѣй рѣцѣ въ юности навѣкъ, рыбами питалъ еси больныхъ въ

велицѣмъ смиреніи и апостоломъ уподобился еси, вопія съ ними: благословенъ еси, Боже отецъ нашихъ.

Отеческими богоприятными молитвами твоими, блаженне, тяжкія приставники измѣнитися къ намъ вскорѣ сотвори, яко да, почитающе борьбы твоя и доблести, взываемъ: благословенъ еси, Боже отецъ нашихъ.

Мудрое слово твое живоотною солю растворенно бысть, вѣрныхъ услаждающее, житіе твое изрядно и паче естества. Тѣмже чудо бысть земнымъ, вопіющимъ: благословенъ еси, Боже отецъ нашихъ.

Богородичень: Фосфорнаго пламене будущаго и осужденія избави мя, Владычице, много согрѣшившаго, Благословенная, Пречистая и Богорадованная.

Пѣснь 8.

Ирмосъ: *Седмерицею пещь халдейскій мучитель богочестивымъ неистовно разжже, силою же лучшею спасены сія видѣвъ, Творцу и Избавителю вопіаше: отроцы, благословите, священницы, воспойте, людіе, превозносите во вся вѣки.*

Иже храмъ Божій бывъ чистѣйшій,
чувственныхъ превыше показался еси, и
Божественную Духа зарю воспріялъ еси, и нынѣ
съ лики ангельскими и пророческими соборы
ликовствуеши свѣтло предъ Божественнымъ
престоломъ.

Лаянія и страхованія, мечтанія и прещенія
невидимыхъ враговъ, устрашающихъ души
твоя твердость поколебати, яко стрѣлы
младенческія вмѣнилъ еси. На гору же возшедъ
высокаго житія, оттуда воспріялъ еси скрижали
богописанныя.

Аще и бѣсы тя искушаху, но ты протяженнымъ
дѣйствомъ поста и молитвы вещество страстей
попалилъ еси и востеклъ еси къ боговиднію.
Нынѣ же ко Христу прешедъ, Егоже возлюби,
молишися непрестанно о почитающихъ святую
память твою.

Любезная и медоточная словеса твоя, Христа
имѣя глаголюща во устѣхъ твоихъ, всѣхъ, якоже
железо магнитъ, привлекоша къ тебѣ, иже
мірскихъ оставльше вещей пристрастіе, Христу
тобою послѣдоваху, прелести избавльшися.

Богородичень: Юже Богъ избра въ Невѣсту
Себѣ, Та явіся носило Незаходимаго Солнца,
мірскій составъ отъ не сущихъ, во еже быти,

приведшаго. Того моли, Пречистая, о иже въ дѣянїя безмѣстная и помышленїя скверная впадшихъ насъ.

Пѣснь 9.

Ирмосъ: *Ужасеся о сѣмъ небо, и земли удивїшася концы, яко Богъ явїся человекомъ плотски, и чрево Твое бысть пространнѣйшее небесъ. Тѣмъ Тя, Богородицу, ангеловъ и человекъ чиновачалїя величаютъ.*

Безчисленныя капли дождѣвныя и песокъ морскїй невозможно изчести. Ниже умъ человекескїй твоя, отче, исправленїя возможетъ изрещи, яже ты, живый на земли, содѣлалъ еси. Тѣмже прїими пѣснь, юже любовїю ти приносимъ.

Отче богомудре, отъ всяческихъ напастей и скорбей исхити, иже твою память радостїю совершающихъ, и блаженства насъ сподоби, егоже самъ присно наслаждаешься, аще и просимое зѣло велико естъ.

Всечудне отче, пѣснь принести твоему достоинству, зѣло скудна естъ сила души моея. Но ты произволенїю благодать воздавай, грѣховъ свободну ми быти, Христа умоли, на земли тя возвеличившаго.

Троїченъ: Истину исповѣдую Божественную въ Трїехъ Лицахъ: Отца и Сына и Святаго Духа, Троицу Всемогущую, и Вседѣтельную, и Непреступную, Еяже милость да улучу, Ромїле преподобне, въ день судный молитвами твоими.

Богородиченъ: Юнице Божественная, на Тебѣ веліе и чудное содѣяся таинство: Бога бо прїяла еси во утробу Твою, и Сего родила еси, и по рождествѣ паки Дѣва пребыла еси.

Свѣтиленъ:

Якоже солнце, просвѣщающее чудесъ зарями вселенную, показался еси, преподобне отче Ромїле, тѣмже души моея зѣницы просвѣти, молюся. **[Дважды.]**

[Слава, и нынѣ,] богородиченъ:

Херувимовъ вышшая и серафимовъ славнѣйшая явилася еси, Дѣво, яко Бога породши, тѣмже вопію Ти: ущедри душу мою, Пречистая.

На хвалїтехъ стихиры [на 4], гласъ 4.

Подобенъ: Яко дѣбля.

Ангеловъ сопричастника и преподобныхъ единокровника, Ромїла, вси да восхвалимъ, иже въ постницѣхъ просїявшаго, и Духа зарями всѣхъ просвѣтившаго, и сокрушившаго врага до

конца чудесь струями, и сего силу
низложившаго вышнимъ пособіемъ. **[Дважды.]**

Яко звѣзда свѣтлѣйшая возсіялъ еси,
преподобне, свѣтлостію вся концы
просвѣтившая, и тму невѣдѣнія чудесы
отгнавшая, и всѣхъ къ разуму истины
приведшая. Но молися Господеви о всѣхъ,
совершающихъ святую память твою.

Авраамово боголюбіе, Іосифово благоговѣинство,
Іаковлю простоту имѣлъ еси, святе, и кротость
Давидову, отонудуже показался еси селеніе
честное, и получилъ еси дарованіе Духа. Тѣмже,
сошедшеся днесь, всепразднственную твою
память совершаемъ, здравіе душамъ
почерпающе.

Слава, гласъ 6:

Преподобне отче, во всю зѣмлю изыде вѣщаніе
исправленій твоихъ, тѣмъ на небесѣхъ обрѣлъ
еси мзду трудовъ твоихъ, демонскія погубилъ
еси полки и ангельскія достиглъ еси чины, ихже
житію непорочно поревновалъ еси, дерзновеніе
имѣя ко Христу Богу, миръ испроси душамъ
нашимъ.

И нынѣ, богородиченъ, гласъ тойже:

Богородице, Ты еси лоза истинная,
возрастившая намъ Плодъ живота, Тебѣ
молимся: молися, Владычице, со святыми
апостолы помиловати души наша.

Славословіе великое. Тропарь преподобнаго.

**Слава, и нынѣ, богородиченъ: Иже насъ
ради... Ектеніи и отпусть.**

НА ЛИТУРГИИ,

**Блаженна отъ канона преподобнаго, пѣснь 3-
я и 6-я.**

**Прокимень, гласъ 7: Честна предъ Господемъ*
смерть преподобныхъ его.**

**Стихъ: Что воздамъ Господеви о всѣхъ, яже
воздаде ми?**

**Апостоль, къ Галатомъ, зачало 213: Плодъ
духовный есть... и тако исполните законъ
Христовъ.**

**Аллилуія, гласъ 6: Блаженъ мужъ, бояйся
Господа, въ заповѣдехъ Его восхощетъ зло.**

**Стихъ: Сильно на земли будетъ сѣмя его, [родъ
правыхъ благословится].**

Евангеліе отъ Луки, зачало 24: Ста́ Исусъ на мѣстѣ равнѣ... се́ бо, мзда́ ва́ша мно́га на небесѣхъ.

Прича́стенъ: Въ па́мьть вѣ́чную бу́детъ пра́ведникъ, [отъ слуха́ зла́ не убойт́ся].

Источникъ: Србъак. — Београд: Издаје Свети Архијерејски Синод Српске Православне Цркве, 1986. — С. 270-279.